

حلمة

أنا في هالدنيا صغير حلم ثقيل وحلم كبير
بابا زوّالي وفقير نسكن في الأبال والوادي
نحلم نقرا بحذا الدار لا نخاف من الدّيب الغدار
دفيان ولا نجوع نهار وعندي صبات كيف أندادي
نمشي للمكتب جيعان حفيان نعدي الوديان
خايف من اللّيل وبردان صوتي يرعش لأمي ينادي
أنا في هالدنيا صغير حلم ثقيل وحلم كبير
بابا زوّالي وفقير نسكن في الأبال والوادي
قلبي يوجعني كي نشوفو بابا يخبي دموعو وخوفو
مكسور خاطرو من ظروفو ويقول نحبكم يا أولادي
لكن ما بيديا حيلة ما نقدرشي نكسي العيلة
حابر انعشّيكم ليلة سامحوني بالله يا كبادي
أنا في هالدنيا صغير حلم ثقيل وحلم كبير
بابا زوّالي وفقير نسكن في الأبال والوادي
بردان ورجليا حفايا على الخدّ دموعي بگايا
في عيوني مليون حكايا ونغني بالصوت إنادي
نحلم نعيش كيف اندادي ما نكونش محروم في بلادي
نعرف أش معناها نفرح نعرف أش معناها أعيادي
أنا في هالدنيا صغير حلم ثقيل وحلم كبير
بابا زوّالي وفقير نسكن في الأبال والوادي

